

四庫全書

史部

欽定四庫全書

欽定石峯堡紀畧卷四

五月十六日庚午

上諭內閣曰甘省逆回田五等滋事經官兵勦拿田五  
中傷自戕餘賊困守馬家堡已成釜底游魂俟其食  
盡計窮別無逃路自必束手就斃前因該督等奏馬  
家堡後靠山居險朕即慮其翻山逃逸早經節次降  
旨傳諭李侍堯迅速親赴該處會同剛塔等設法四

面嚴密圍堵毋使賊匪一名免脫乃於朕旨未到之  
先剛塔惟知在堡前圍勦並不嚴防山後去路致賊  
得以設計乘間奔竄該提督又不星夜帶兵追捕迨  
賊已遠颺止在後尾追任其肆出劫掠李侍堯唯安  
坐靖遠以辦理逆犯家屬為畏避地步並不親赴該  
處調度會勦及聞賊人逃逸毫無措置失志張皇仍  
不即行親往此事若仍交伊二人辦理恐致貽誤倘  
日久使賊蔓延尚復成何事體是以特命尚書福康

安帶欽差關防同領侍衛內大臣海蘭察帶領巴圖魯侍衛章京等馳驛前往福康安等素嫻軍旅且現在兵力厚集賊匪餘黨自可尅期撲滅地方百姓亦得早就奠安似此小醜跳梁原不值特派大臣前往但以該省督提辦理不善不得不簡重臣督率整頓以期速於蕆事所有辦理不善之文武各員統俟賊匪剿除淨盡後福康安按其功過核其情罪詳奏聞另降諭旨

上又諭內閣曰甘省小山逆回田五等謀興新教煽誘  
匪徒搶掠村堡擾害良民現在賊首雖已就斃而夥  
黨尚未勦淨其所過地方百姓田廬牲畜被其刦掠  
及聞信驚避遷徙流離者均為可憫著福康安到彼  
即會同該督將該處村庄戶口詳晰查明酌量撫卹  
其應行蠲免錢糧及給與口糧之處一面辦理一面  
分晰具奏以示朕安撫良民務期得所之至意

臣等謹案甘省百姓平時仰沐

厚澤深仁蠲租給復亦既樂利盈寧共享昇平之福此  
次猝遇逆匪滋擾編戶小民未免畏避兵燹流

離遷徙我

皇上如傷在抱軫念邊氓於逆回煽動之初已

特諭督臣體察地方情形量加撫卹茲復因賊黨翻山

竄逸沿途所過村庄必有被其擾害者復

命尚書臣福康安到甘後即行詳查賑卹

巽命載申

恩膏疊沛該省之民安作息而戴

堯天莫不論肌浹髓宜民人展廷隆父子以死拒賊不  
為脇從所謂感發天良憤由義激豈非

聖人仁德之被雖顓蒙亦知深喻乎

同日畢沅奏言臣近接督臣五月初一日來咨逆

回竄入官川聚衆千餘人尚需各路官兵會勦現  
在飛催陝省官兵迅速前往臣標兵五百名約計  
日內已可抵甘應聽督臣就近調遣至定邊係延

安府所屬與甘省之靈州接壤距鹽茶廳不遠回  
民衆多該處離榆林不過三四百里延綏鎮臣策  
布坦現在就近前往彈壓亦可藉以策應至鳳翔  
隴州等處皆與甘境犬牙相錯為回匪出沒之所  
倘有賊匪竄入秦鞏一帶必須分兵堵截昨興漢  
鎮臣三德亦已帶兵在鳳翔駐劄賊匪尚未撲滅  
盡淨此二路之兵足資控制再查西安府滿營及  
軍標撫標調赴甘省協同勦捕官兵共三千五百



名於四月二十六日分起起程每起五百名連日行走至五月初五日已全數出陝西長武縣境約計頭二兩起官兵此時已抵安定會寧一帶餘亦接續前進迅赴督臣調往地方以資協勦奏入報聞

五月十七日辛未剛塔奏言臣於五月初八日至杜家園子探知賊人竄往草芽溝馬營街一帶臣隨與副都統臣圖桑阿提臣俞金鰲商籌令寧涼

二鎮遊擊高人傑汪啟帶領滿漢兵五百名先往  
追勦臣同圖桑阿俞金鰲蘇靈吉蘭泰督兵亦即  
隨後陸續趕赴馬營街時領隊大臣永安帶領西  
安滿漢兵一千名先於初八日酉刻到馬營街對  
賊扎營至初九日卯刻蘇靈等所帶之兵隨同永  
安從北山梁進攻賊匪亦即前來迎敵正在交戰  
之際臣同圖桑阿俞金鰲五岱先後俱到當即督  
兵奮擊我兵鎗箭齊發打死賊人四十餘名割取

首級二十五顆奪獲馬一匹鳥鎗一杆賊匪帶傷者亦多隨即敗去退據高山我兵追至山坡正在攻擊忽天降大雨隨將官兵撤回與賊相對拏營臣等察看賊匪在南面高山扎營三座俱係新白布帳房賊人約有千餘名自本日酉時天雨至初十日寅時方止臣等現在和衷商辦設法攻勦務期迅速殲滅毋使一名漏網再遊擊高人傑等拏獲賊回家眷男女共三十二名車六輛臣當即訊

明正法記

同日李侍堯奏言臣於初九日據會寧縣稟報西安將軍傅玉所帶之兵於初七日已至會寧探明提督之兵現在何處即行前往等因查提臣在西鞏將軍同日至會寧相去六十里自可會合從馬營小路跟踪追捕茲復據通渭縣稟稱縣屬回民稟首花楊凹寺子鎮等處回民將家口搬入石峯堡聚集多人持有器械於初六日搶掠蔡家堡賊

首係楊填四等情臣查石峯堡蔡家堡均係通渭  
地方該犯等糾衆滋事適當賊匪搶掠西鞏之時  
或係預先勾合臨時接應或係另有新教匪徒乘  
機滋擾均未可定且附近之伏羌西和回衆較多  
不可不防臣昨聞賊人從小路竄入通渭境內恐  
其逼近鞏昌該處尤為緊要已飛飭前派往安定  
之兵五百名徑赴鞏昌防護現在將軍提督之兵  
合為一處西安後撥之兵即將踵集自可協力殲

擒臣在靖遠現無留辦之事擬酌留弁兵在靖彈  
壓臣即日起程星赴安定鞏昌一帶視賊踪較近  
之處駐劄庶聲息更通一切易於相機辦理再臣  
連日審訊靖遠城中與賊內應知情之犯鉄光彩  
等三十六名又賊營逃回被拏之犯張六巴子等  
五名又官川赴靖遠送信約人之賊馬經一名俱  
已供認確鑿審明後即將該犯等正法并將緣坐  
犯屬十七名一併正法訖又據臬司陳步瀛將在

鹽茶審訊拏獲賊犯及從逆犯屬稟請核辦臣查  
李化玉一犯係由馬尾川糾合徒黨往小山從田  
五入夥造逆與幫同田五倡復新教已經凌遲之  
馬海龍厥罪惟均迨從賊營敗竄潛回復敢拒捕  
傷人尤為兇惡應即凌遲梟示又自賊營逃回之  
李自虎等六犯及順從新教知有逆謀之馬守伏  
等四十二犯暨犯屬田自俊等十二名均已飭該  
司即在鹽茶正法訖再本月初九日臣接據副將

八十五王柱等稟稱連日在鷹窩石用礮轟擊賊船一面堵截隘口賊人情急攜眷入船開船逃遁官兵即行迎截用鎗箭擊射斃賊甚多其婦女多投河自盡計殲斃者二百餘人間有棄船爬崖之賊因崖石陡削不能爬上不過二十餘人等情是鷹窩石賊匪已可盡數殲擒俟勦除淨盡此項官兵即可撤回調赴提臣軍營勦賊均奏入

上命軍機大臣傳諭福康安五岱李侍堯剛塔俞金鰲



圖桑阿曰剛塔奏初九日馬營街勦賊情形一摺者此光景較前稍有起色但賊現在屯聚馬營街剛塔俞金鰲圖桑阿等所帶之兵俱已到齊即應各領將兵分布前後左右將賊人四面合圍併力進攻方能一舉集事盡數殲除不致仍前翻山逃竄乃閱摺內該提督等仍會集一處並不籌算及此若復致賊人翻山而遁更屬不成事體又本日據李侍堯奏稱靖遠現無留辦之事即起程前赴鞏昌安定一帶賊踪

較近處駐劄辦理等語李侍堯既知應親往辦理即當星赴馬營街打仗處所與剛塔等面商妥辦乃僅於賊踪較近之處逗遛駐劄是何言耶看來此事剛塔惟知在賊後尾追全不籌及繞在賊前並督率官兵分布左右以期四面圍殺不使竄逸俞金鰲圖桑阿等則以勦賊為剛塔一人專責伊等如幫辦者然而李侍堯則一味退縮不前仍思於賊踪不到之處遙遙安駐似勦賊事宜與伊無涉彼此推諉竟無一人

實心承辦李侍堯剛塔俞金鰲圖桑阿著再傳旨嚴行申飭此時若再不派重臣前往督率恐有貽誤昨已令尚書福康安同領侍衛內大臣海蘭察帶同巴圖魯侍衛章京等馳驛前往但福康安到彼尚需十餘日而此時勦賊正在緊要之際五岱素嫺軍旅曾為叅贊大臣福康安未到之先即著五岱總理一切所有彼處帶兵之大臣官員俱聽其節制調度五岱此時務當相度機宜速籌圍勦不可使賊人有一名

免脫亦不可因福康安未到稍存觀望等候之見至賊人自馬家堡奔竄後又有楊填四等聚衆接應並有張阿渾馬建功等亦被賊人糾約入夥以致復行屯聚且賊營內俱係新白布帳房又有鳥鎗等項器械賊人甫經竄逸各處回民即紛紛接應入夥帳房器械等物俱非倉猝可辦從前蘇四十三滋事尚因副將新柱知府楊士璣激成此次賊匪竟係蓄謀已久暗中勾約預備所以能同時聚擾皆由李侍堯平

時不能督率地方文武官弁漫無防範覺察所致俟  
事竣後著福康安查明詳悉叅奏另降諭旨又前此  
賊田五等自小山起事後其餘賊由鹽茶廳至西鞏  
驛一帶四出奔竄所經之處地方已屬遼遠沿途村  
堡被賊搶掠百姓受害者必多且前據該督等查有  
民人展廷隆因賊脇令入夥不從父子被害可見民  
人等平時受朕撫卹深恩雖遭荼毒仍至死不肯從  
賊殊堪嘉憫昨已降旨令福康安到彼會同該督即

詳晰查明酌量撫卹李侍堯接奉諭旨即速先行普  
諭各屬務期良民安輯毋使一人失所再據李侍堯  
奏分竄鷹窩石賊匪經副將八十五王柱等帶兵迎  
截擊斃甚多所辦尚好八十五王柱等於分竄之賊  
能奮勇截殺亦屬可嘉著存記俟事竣後福康安查  
明果係出力奏聞候朕降旨其餘賊二十餘人李侍  
堯仍嚴飭該副將等上緊擒拏務獲勿任乘間逃竄  
同日大學士公阿桂奏言竊照此次逆回在馬家

堡翻山竄逸皆由後路不能防範以致乘間潛逃  
其賊匪人數忽少忽多俱係據弁兵探報究未能  
得其確實看來賊回所過地方自不免有新教回  
人附會滋擾此外回民似不至風聞煽動該省前  
經調集各路官兵今添派四川屯練番兵及阿拉  
善兵並令旺沁班巴爾親身帶領前往現在福康  
安等前往督辦自無難尅期剿滅至目下籌辦剿  
捕事宜臣悉心揣度甘省地方貧瘠官場尤為清

苦辦理軍需本非易易近因內地用兵鹽菜口糧  
俱從刪減官兵所得月糧按日計算每日僅得三  
分一經調遣該兵丁等尚須留瞻家口沿途費用  
必致不敷且非官為隨地支給亦不能常川接濟  
竊恐承辦各員或有貽誤所關非細更恐該兵丁  
等因餬口拮据臨時或致逃匿更屬不成事體臣愚  
以為此事最關緊要仰懇

聖恩傳諭李侍堯詳悉體察有應照舊例支給者仍照



舊給發事竣後聲明必須情由准其酌量報銷且  
不必斤斤過於樽節如此庶承辦之員既不虞掣  
肘而該兵丁等得資飽騰自必倍切奮勉勇往集  
事奏入

上命軍機大臣傳諭李侍堯曰甘省逆回滋事節經檄  
調西安滿漢官兵及寧夏涼州等處滿兵並各提鎮  
所屬兵丁進剿不下數千人其如何支給應付之處  
總未據李侍堯詳悉奏及看來此時李侍堯竟屬張

皇失志一籌莫展諸事漫無料理兵丁等追勦賊匪  
鹽菜口糧最關緊要況今又調川省屯練降番兵及  
阿拉善蒙古兵到彼協勦此項兵丁俱從別處徵調  
前來應得口糧必需隨時寬為應付從前勦捕蘇四  
十三時所調川省屯練及阿拉善兵並陝甘官兵土  
兵支給鹽菜口糧俱辦有章程著傳諭李侍堯即派  
委大員專司妥協辦理照前支給不必拘泥成例俟  
事竣後具奏將必需情由聲明候朕酌量降旨庶承

辦之員不虞掣肘而兵丁等得資飽騰自必倍加奮  
勉勇往從事並諭福康安知之

同日傳王永安奏言竊臣傳王於四月二十六日  
由西安帶領頭隊二隊官兵一千名星即起程於  
五月初七日前抵會寧縣地方接據提臣剛塔來  
咨知回賊由西鞏驛小路竄奔馬營等處臣傳王  
正欲整兵往追適臣婿巴里坤副都統臣永安進

京

陞見行至山西聞甘省逆回滋事奏請前往協勦於初  
七日行抵會寧請先行帶兵追賊臣傅玉即將所  
領西安兵一千名交永安先行往追臣永安已於  
初八日帶兵直抵馬營與五岱剛塔俞金鰲圖桑  
阿吉蘭泰蘇靈等會同打仗臣傅玉暫留會寧俟  
後隊兵陸續到齊即星赴永安軍所奏入

上命軍機大臣傳諭傅玉旺沁班巴爾永安莽古賚敷  
倫泰明善曰傅玉行至會寧地方聞賊在馬營即將

所領西安兵交永安帶領前往殲賊所有前隊西安兵一千名著即交永安調用其明善所帶後隊之兵著交調任西安副都統敷倫泰即速帶領馳赴永安駐劄之處與五岱等併力剿賊傅玉年老於用兵機宜未經歷練著與明善並回西安同哈青阿守城至莽古賚亦已年力就衰著回寧夏駐守所派寧夏滿兵著即交旺沁班巴爾一併帶往馬營等處協同五岱等剿賊

五月十八日壬午五岱永安剛塔俞金鰲圖桑阿  
奏言臣等於初十日寅刻派西安滿洲協領和興  
額遊擊高入傑等帶兵四百名搶賊人所佔之西  
山頂又派遊擊皂王保都司福德保岱什衣守備  
馬斌帶兵五百名同西安滿洲協領韋陀保所帶  
滿兵二百名直向賊所據中間山頂賊營攻擊又  
涼州滿營佐領德亮八十七帶滿洲兵二百名搶  
奪賊人所據山卡西安副將保興帶兵二百名策

應又令土司楊宗業挑選番兵三百名派都司舒  
寧阿帶領進攻東山頂賊營臣五岱永安剛塔俞  
金鰲圖桑阿蘇靈阿蘭泰督兵接續於初十日辰  
刻進剿奮擊賊衆亦前來迎戰往返擊壓至申刻  
賊衆俱行上山我兵殺賊甚多拏獲活賊三名搶  
獲賊馬數匹鳥鎗三杆惟時土司楊宗業之番兵  
進攻東山賊營不意賊匪自山頂冲壓番兵退走  
臣等即督兵迎擊救護賊衆方退值天氣已晚微

雨臣等暫行對賊拏營十一日天未明時據哨探人報賊人帳房俱已不見賊人又復潛遁臣等隨派高人傑汪啟帶兵四百名尾追並派總兵蘇靈吉蘭泰帶兵一千名分路追擊本日已刻據高人傑等報稱賊匪於本日天明以前俱往石峯堡一帶臣等速令高人傑汪啟及兩鎮所帶之兵前往追擊臣等亦刻即帶兵隨後接續前進

同日五岱等又奏言臣等於初十日打仗時拏獲



活賊三名蔡有元等供稱安定縣屬沙馬溝馬家  
河地方俱有新教馬營街盡係新教現在領頭打  
仗頭人名叫馬阿不都馬之先沙之玉馬世雄此  
四人都是三掌教頭目還有小頭人四人名叫馬  
旺馬彪馬有素服沙有娃子現在馬阿不都要約  
會石廟兒蔡家堡珠子山菜子川石溝裡義岡川  
石峯堡等處新教聚集往通渭去又臣等於初九  
日戌刻接據靜寧州知州涂躍龍稟報石峯堡回

匪於初六日夜搶掠蔡家堡已截留所調西安兵  
一千名在該州並所屬之偏林堡一帶隘口設卡  
彈壓同時又據安定縣知縣陳善儀報稱初八日  
有賊七八百人到馬家河搶掠雙尾子山亦有賊  
匪在彼扎營初十日辰刻據通渭縣知縣王懷稟  
報蔡家鎮於初六日夜間被賊攻掠現在石峯堡賊  
回又糾合會寧車黃家地方回民同往堡內復又  
四路糾聚約有回衆數千人虎狼溝亦聚有賊匪

數百人又據會寧縣知縣李堡稟報通渭義岡川  
居住民人投報逆回約有三四百衆擁入該堡殺  
掠焚搶是夜並擾魏家石溝黃家岔花亭下各處  
又據西安將軍傅玉來咨稱初九日在會寧城外  
拏獲賊回一名據供稱石峯堡只有一條道進去  
四面多是石峽再無出路賊回欲將官兵誘入裡  
外夾攻雖所供未足為據不可不小心防範臣等  
惟有相機儘力辦理並咨明督臣添兵各處堵截

務期速行擒滅淨盡均奏入

上命軍機大臣傳諭五岱李侍堯剛塔俞金鰲圖桑阿  
曰昨因剛塔奏賊匪竄往馬營街該提督等仍係會  
集一處並不籌及四面合圍朕即慮其復致賊人翻  
山而遁已有旨傳諭五岱等速籌圍剿不可使賊人  
有一名兔脫乃本日奏到賊人又復逃竄並據奏石  
峯堡等處回民俱有聚集搶掠之事看來此事竟係  
剛塔在馬家堡縱賊竄逸以致得以散往各處又復

勾合匪徒四出劫掠此時若仍交剛塔辦理必至債事五岱嫻習軍務人亦老練明白自知進止機宜但閱所奏摺內稱接據傳玉來文拏獲賊回訊供賊人想把官兵誘至石峯堡堡內止有一條進路賊人便可前後夾攻等語雖賊匪供詞不足憑信第用兵固當勇往向前亦不可不知慎重石峯堡縱屬險要然該處附近居民自必熟悉路徑五岱等宜詳悉訪問總以小心防範毋稍疎忽或實係險隘不妨別尋路徑

四面圍勦勿再使竄逸為要至賊人雖四散聚眾滋事但總由馬家堡賊匪竄出以致各處勾合聚集滋擾此時五岱竟當專力勦捕馬營街之賊現在兵力厚集尤可設法分布前後左右四面圍住勦殺以期盡數殲除此項賊匪既殲除淨盡其餘匪黨聞風畏懼已聚集者自當紛紛解散未起事者亦可消其逆謀總之兵貴神速不可徒事尾追致賊得以肆行刦掠也再據奏稱拏獲活賊三名所獲之賊係何名姓

作何正法曾否訊取供詞拏獲者係何員弁又李侍  
堯昨日奏到賊營逃回李自虎等六犯及知有逆謀  
之馬守伏等四十二犯暨從逆犯屬田自俊等十二  
名又係何人所獲總未據詳細奏明著傳諭李侍堯  
等即速分晰查明具奏

上又命軍機大臣傳諭阿桂福康安曰據五岱等奏賊  
人復行竄逸且有石峯堡等處回民聚集滋擾之事  
並稱回匪頭人有馬阿不都馬之先沙之玉馬世雄

四人都是三掌教頭目更有小頭人四名等語新教匪徒竟有三掌教名目可見伊等掌教內已有等第層次是其蓄謀已久必非朝夕所能猝合李侍堯身為總督且從前勦除蘇四十三後所有斷除新教之事即責成該督專辦乃該督於新教回匪等公然自立掌教名目等次之事毫無覺察任其煽惑勾結以致釀成事端豈封疆大臣惟知厚享廉俸安坐衙齋而於地方此等重大事件全不留心防範有是理乎



福康安到彼即查明此事如果係李侍堯平時漫不經心養癰貽患所致即據實嚴叅具奏至賊人屢次逃逸糾合夥衆擾害地方揆度情形必須滿洲勁旅前往方能迅速歲事著傳諭阿桂於火器健銳兩營內挑選精兵一千名預備聽候諭旨再行帶領起程所有分隊帶領之侍衛章京等並著酌量選派京兵聲勢壯盛經阿桂帶領前往尤足以壯軍勢而懾人心阿桂所帶京兵一到自可會同調度剋期竣事也

臣等謹案賊回自馬家堡逃竄後逞其故智屢經翻山潛逸又復四出勾引糾聚日多皆由該督提等並不籌及四面圍剿致賊得鋌而走險苟延殘喘自當厚集兵力速行盡數殲除

皇上揆度事機已

命尚書臣福康安統率將弁前往督辦復慮該省綠營官兵未能一舉集事因

命大學士公臣阿桂再簡滿洲勁旅會同協剿迨後京

兵一到擒渠蕩穴尅日蕨功良由

神鈴遠燭先事預籌所以能風馳霆擊迅掃賊氛也

上又命軍機大臣傳諭直隸總督劉綎河南巡撫何裕

成陝西巡撫畢沅曰甘省逆回滋事該處綠營弁兵

未能迅速歲事尚須另派滿洲勁旅前往剿捕已傳

諭阿桂於火器健銳兩營內挑選精兵共一千名分

為五起預備前往所有沿途應用車輛著傳諭劉綎

何裕城畢沅不動聲色飭屬密行妥備勿致臨時遲

誤亦不可稍涉張皇直隸派景祿河南派江蘭陝西  
派圖薩布崙司其事護送出境

欽定四庫全書

欽定四庫全書  
卷四

五

欽定石峯堡紀畧卷四

欽定四庫全書

欽定石峯堡紀畧卷五

五月十九日癸酉李侍堯奏言臣於四月二十六日與提臣相晤於劉家井議以臣赴靖遠督捕糜子灘竄匿鷹窩石之賊提臣由余家溝李陽川一帶搜捕餘賊防其竄入官川嗣賊人竄據馬家堡於五月初二日與官兵打仗臣竊以賊人既入馬家堡官軍堵截攻圍即可在此完結不謂賊人雨

夜潛逃提臣帶兵尾追已落賊人之後追賊人初六日焚搶西鞏提臣於初七日追至賊已翻山南竄由小路至通渭縣之馬營地方而通渭之石峯堡復有聚匪乘機滋擾臣查杜家園距馬營數十里提臣已於初八日至彼若分兵迅往自可追及賊踪痛加勦戮俾不敢侵犯通渭乃連接該縣稟報情形甚為緊急若馬營之賊與石峯堡賊匪合為一處則通渭甚屬可虞其毗連該縣之伏羌西

和回衆較多萬一交通接應愈難辦理臣現在兼  
程前赴安定與將軍提督聲息相通惟有嚴督將  
弁迅速辦理再臣查此次勦賊各路官兵齊集所有  
兵丁口糧馬匹料草臣早飭藩司轉飭地方官預  
備供支復令多辦炒麵乾糧以便裹帶並多雇牲  
畜馱運糧豆其草束一項鄉村多有存積購買尚  
易擬酌給兵丁折色銀兩令其隨處買用臣查臬  
司陳步瀛現在鹽茶審辦案犯將竣即飛飭該司



馳赴安定會寧一帶督率經理無悞供支奏入

上命軍機大臣傳諭福康安曰據李侍堯所奏其意亦以為賊人遁逸剛塔並不星夜帶兵趕捕繞在賊前截殺惟知在後尾追致賊得以勾結匪黨四出剽掠摺內措詞皆隱隱叅奏剛塔總督與提督平日雖屬平行至行軍之時一切皆應聽總督調度如李侍堯親往打仗處所督率籌辦剛塔仍然怯懦不前原不妨據實叅奏乃該督惟知安坐靖遠觀望迨邇及賊

已遠颺惟知以落在賊後歸咎剛塔試思伊不又落  
剛塔之後乎至所稱馬營之賊與石峯堡之賊合為  
一處則通渭甚為可虞新教匪徒到處勾結今賊匪  
既已竄往通渭則石峯堡之賊人自必聚集入夥著  
福康安到彼迅速籌辦勿使再有蔓延方為妥善

上又命軍機大臣傳諭甘肅布政使馮光熊曰甘省逆  
回滋事總督李侍堯帶同臬司陳步瀛前往靖遠一  
帶蘭州省城止有藩司馮光熊一人在彼照料乃面

月以來並未見馮光熊陳奏一摺該省總督業經公  
出一切地方應辦事宜均係藩司經理該省現有回  
匪滋事官軍前往勦捕安定一帶距省不遠現在作  
何籌備防範之處甚關緊要乃馮光熊總未據奏及  
從前蘇四十三滋事之時王廷贊尚知將情形具奏  
數次馮光熊係由軍機司員擢任藩司豈轉不能見  
及此耶馮光熊著傳旨嚴行申飭並將現在作何防  
範情形迅速具奏

二十日甲戌五岱永安岡塔俞金鰲圖桑阿奏言  
臣等於本月十一日據偵卒報稱馬家灣見有賊  
回數百名自西北往東南山溝行走臣剛塔當即  
派遊擊汪啟帶兵二百名先行追拏臣等隨後帶  
兵前進至馬家灣遊擊汪啟業將賊回殺死二十  
餘名奪獲軍器十六件殺賊家眷三十二口又拏  
獲受傷活賊一名究問賊衆現往何處逃走據供  
現在賊人眷口數千俱在石峯堡居住與官兵打

仗之賊亦有千餘名商酌將石峯堡家眷接取保護前往伏羌秦州一帶糾會賊衆等供臣等隨星速跟踪前往追剿是日申刻據通渭縣知縣王懷稟報有賊回數百圍攻縣城甚急請發兵救援臣剛塔派兵三百名令都司福德保岱什衣帶領星夜馳往通渭剿捕於十二日亥刻據福德保等稟報十二日寅刻帶兵抵通渭縣賊匪已在城中放火燒毀城隍廟一座知縣大堂一座民舖十餘處當

即率領官兵前進排列鎗箭矛刀奮勇勦拏而賊  
回見我兵勢盛即鼠逃出城外在北山上扎營隨  
即率領官兵追趕用鎗擊打奪獲賊馬一匹殺賊  
二十餘名查該縣倉糧並未燒壞銀庫已被打破  
銀錢無存獄中囚犯盡數被賊放走王知縣在後  
園中倉房內藏匿劉訓導跳樓右腿跌傷典史溫  
模自縊身死並詢據該訓導稱賊回自初八日酉  
刻攻城至十一日戌刻用長木綑梯上城攻破城池

今賊既逃竄出城隨將城外百姓放入城中撥令壯健者上城與官兵三百名一同防守賊退走之後於十二日未刻復會集賊匪約有四五百名在城東南山頂札營距城三里等因臣等據稟即於堵禦鹿鹿山之兵續派二百名令其前往接應再臣等於十二日午刻追賊至鹿鹿山賊回在山頂札營三座山勢高險道路窄狹現今臣等設法連行進擊賊仍負隅死守查賊回所佔鹿鹿山石峯

堡係通伏羌通渭秦州鞏昌會寧安定等州縣一帶總路要隘臣等即在對面拏營並分派官兵於各路口嚴行堵截奏入

上命軍機大臣傳諭阿桂福康安五岱曰賊人現在鹿鹿山扎營剛塔等仍止在對面拏營又不籌及堵截圍攻之法是復縱令賊人得有去路現已派阿桂福康安帶同侍衛章京等並京兵一千名前往督勦五岱等此時雖不能奮勇殺賊當此兵力厚集之時自



當分撥將領四面堵圍防其又從後路竄逸俟阿桂等到時再行會合殲擒再據五岱等奏拏獲活賊一名訊據供稱現有賊人眷口數千俱在石峯堡居住又商議將石峯堡家眷接往伏羌秦州一帶等語賊匪家眷既有數千口由石峯堡前往伏羌秦州伊等此時何不派兵分路前赴該處截住賊人並將賊犯家屬盡數擒斬勿使又得與人會聚豈伊等不能殲除賊衆而於賊人留下之老幼眷屬尚不能派兵截殺

必待朕數千里外一一為之指示耶著五岱即遵旨  
於永安八十五玉柱等數員內酌派一員迅速帶兵  
前往勦辦毋使一名漏網至賊匪既攻破通渭城內  
居民自必被其擾害現在作何安撫庫項錢糧被賊  
搶去者若干其放走監犯有自行投回者著福康安  
詳晰查明具奏典史溫模聞城破自縊沒於王事尚  
屬可憫應予議卹其訓導因跳樓跌傷情尚可矜至  
知縣王懷因畏賊先行逃匿不能督率兵民在城防

護以致失事並著阿桂福康安到彼會同查明據實  
參奏

同日李侍堯奏言臣前因賊人已至西鞏該處有  
小路可至通渭伏羌當即咨會提臣撥兵前往堵截  
茲連據通渭縣稟報石峯堡所聚之賊搶掠村堡  
並已環城攻圍焚搶西關該縣防護只有民夫不  
敷防守臣甚為焦急即飛飭派往鞏昌之兵五百  
名先往協同守護並據提臣等以軍營兵力稍單

尚須接續臣查附近提鎮之兵所調已多其遠處各營又緩不濟急現有涼州肅州二鎮續到兵六百已飭令趕赴軍營又鷹窩石之賊勦除殆盡所有副將八十五原帶兵五百名臣亦飭星赴安定就近撥往提臣軍營再臣調赴防護通渭之兵五百名現據提臣咨已另派兵三百名前往此項官兵並可調赴軍營是現在派往之兵已有一千六百名足敷接續至軍營糧食最關緊要臣早飭藩

司轉飭附近之會寧隴西安定靜遠等州縣預備  
炒麵乾糧料豆等項運送前往臣復派蘭州道宋  
維琦督催經理惟是經過山徑叢雜現在安定會  
寧一帶鄉村均有賊踪恐其潛伏搶掠或有疎虞  
臣又派兵四百名輪流護送以期不悞供支臣明  
日即抵安定再行察看情形辦理奏入報

聞

同日甘肅按察使陳步瀛奏言竊臣接督臣李侍

堯札知賊回現圍攻通渭縣城調臣馳赴安定一  
帶隨同查辦臣於五月十二日自鹽茶起程十三  
日戌刻行抵隆德縣城接據平涼府知府王立柱  
署靜寧州知州涂躍龍報稱西安副都統明善帶  
領滿漢兵一千二百名於十一日由靜寧州前往  
石峯堡進剿又據馬夫探稱十二日官兵抵高廟  
山滿兵先佔山頂賊人各執刀矛仰面上攻官兵  
往下放鎗打死賊人數十名賊人退回石峯堡官

兵乘勢追趕奪得頭卡撫標兵續至正在劄營賊人又從山上下撲官兵抵敵不住即時冲散嗣據行營官兵陸續回營俱稱副都統明善已中矛傷陣亡等情臣聽聞之下不勝駭異賊回草竊小醜胆敢抗拒官兵並將領兵大臣殺害逞凶犯順不法已極查將軍傅玉副都統永安圖桑阿提督剛塔俞金鰲合兵數千駐劄通渭之馬營街大兵雲

集震讐

天威現雖偏師失利逆回必不致遽肆鴟張惟高廟山  
距靜寧隆德平涼等州縣僅八九十里至百餘里  
不等靜寧現有兵三百名該州縣慮其乘虛東犯  
羣請益兵防守若俟稟請督臣派撥誠恐輾轉遲  
延臣從固原經過詢知彼處尚存兵一千五百名  
現已飛扎副將張拱酌調兵五百名分撥隆德平  
涼兩縣防護城池臣即星赴靜寧州會同將備收  
集餘兵嚴防要隘以遏賊鋒至督臣李侍堯於十



一日由靖遠一帶進發計日將抵安定一切進剿事宜諒已熟籌方畧臣俟靜寧籌辦防守事畢仍馳至督臣行營隨同料理外所有現在賊匪情形及調兵防守緣由理合具奏奏入

上命軍機大臣傳諭阿桂福康安五岱陳步瀛曰據陳步瀛奏稱西安副都統明善帶兵由靜寧前往石峯堡進剿十二日抵高廟山擊賊中矛傷陣亡前因五岱等奏稱傳玉孥獲賊匪訊據供稱賊人想將官兵

誘至石峯堡內裏外夾攻朕即有旨傳諭五岱等務  
宜小心防範今明善竟於石峯堡被害自係該副都  
統未悉彼處地勢以致誤中賊人之計殊堪憫惻其  
所帶官兵內恐亦有受傷陣亡者著阿桂福康安到  
彼後查明具奏一體優卹至賊人既如此鳩張而彼  
處又無有主見能辦事之人福康安不可不兼程星  
赴該處籌辦即阿桂亦當即日帶領京兵分起前往  
以壯軍勢而懾人心所有帶兵之侍衛章京等即著

阿桂一面挑帶派往一面奏聞再據陳步瀛奏稱高  
廟山距靜寧隆德平涼等處僅八九十里至百餘里  
不等該州縣兵力無多恐賊人乘虛東犯已飛札固  
原副將張拱酌調兵五百名分撥隆德等處防護並  
星赴靜寧州收集明善所帶餘兵嚴防要隘以遏賊  
鋒等語所辦甚好該處兵力既單賊人乘勢搶奪斷  
不可不防該臬司所辦尚屬能事自當如此嚴密堵  
禦勿使賊人再行乘間奔竄

臣等謹案賊匪佔據石峯堡恃險負隅抗拒官兵竟敢戕害大員攻掠縣城實為罪大惡極雖寸磔不足蔽辜而揆厥所由總因該處帶兵大員毫無籌畫縱賊遠颺以致賊人勾結匪徒久延殘喘未能剋日翦除

皇上神幾坐照洞悉情形爰命福康安兼程星速赴甘臣阿桂帶領勁旅即日啓程所謂兵貴神速先聲所鼓足以奮揚士氣而震讐

天威迨乎大軍雲集壁壘一新不待兼旬賊黨盡數殲

擒詎非

睿謨廣運勝算先操之明驗歟

上又諭內閣曰甘省逆回滋事未能迅速剿滅已派福康安帶領巴圖魯侍衛章京等前往勦辦著再派阿桂帶領侍衛章京並京兵一千名分作五起阿桂先帶領頭起由驛起程從河南一路行走前往其隨帶軍機處司員並著一體馳驛

上又命軍機大臣傳諭阿桂福康安曰現今阿桂前往  
甘肅會同福康安辦理勦賊事宜所有福康安佩帶  
之欽差大臣關防即可令阿桂作為將軍印信福康  
安海蘭察五岱等並為叅贊大臣協同經畫至屆期  
進勦時賊匪內有應誅戮者即行誅戮若俘獲賊首  
要犯酌揀數名派委幹練官兵護送迅速解赴熱河  
務飭該解員等沿途小心防護毋稍疎縱並於起解  
時飛咨所過省分督撫嚴飭地方文武員弁按站派

兵協同護解

二十一日乙亥李侍堯奏言臣於本月十四日據提臣剛塔札知由馬營街一路於十二日追賊至葦蕪灣地方賊匪現在魯山扎營並咨令速派弁兵赴通渭救援正在籌計間是日又據都司福德保岱什衣稟報該都司等於十二日寅刻前抵通渭賊回已將通渭縣城攻破倉糧並未燒壞庫項無存獄犯盡數放逸知縣王懷在倉房內藏匿現

在賊回竄出城外復於東南山上扎營等由嗣據  
平涼府知府王立柱稟稱副都統明善於本月十  
二日帶兵從偏麻堡赴石峯堡勦賊打仗中矛受傷  
陣亡等情伏查臣前因通渭情形緊急一面將赴  
鞏昌防守官兵五百名檄令就近前往防護復以  
提臣在馬營勦賊較鞏昌至通渭更近隨即飛咨  
令撥兵救護乃臣前遣之兵未及趕到提臣所撥  
之兵甫經到彼而通渭縣城先為賊所攻破雖經



都司福德保岱什衣擊退賊匪而賊衆旋散旋聚  
仍復近城扎營與石峯堡之賊互相聯絡副都統  
明善帶兵往勦又因中傷陣亡現在軍營滿漢官  
兵合計雖有數千而賊人散竄滋擾勢難分路勦  
捕兵力仍單臣現在飛調寧夏滿洲兵一千名再  
調寧夏鎮標兵五百名星赴軍營又莊浪城守尉  
額爾恒額現帶滿洲兵二百名在省城彈壓臣亦  
令前赴軍營據河州總兵哈當阿稟稱韓土司所

管老教兵已令挑選一千名預備臣查前年老教  
土兵打仗甚為得力現亦將此項兵丁調來應用  
茲臣已抵安定查該縣有甘標留駐兵三百名即  
遣往通渭協同防守並再飛催肅州涼州及臣標  
副將八十五從鷹窩石撤回之兵星赴提臣軍營  
惟是賊人糾合各處新教敢肆猖獗日聚日多臣  
晝夜焦憂似此情形恐難尅期歲事仰懇

皇上天恩簡派久經行陣之大臣官員來甘會同辦理

以期迅速完結奏入

上命軍機大臣傳諭阿桂福康安曰據李侍堯奏請調寧夏滿洲鎮標兵丁星赴軍營會勦看來賊匪自馬家堡翻山逃竄之後沿途勾結聚集愈多而通渭縣石峯堡等處之賊又暗相聯絡攻破縣城傷害帶兵大員猖獗已甚必須及早殲除以靖地方茲剛塔率領各處官兵已不下數千名軍勢不為不盛而馬營街石峯堡俱係通渭縣地方相距又不甚遠何以剛

塔由馬營街一路追賊而於通渭縣城失守之處竟  
毫無策應且副都統明善於石峯堡遇賊打仗亦以  
單軍失利中矛陣亡剛塔亦並未派兵救援近在一  
縣之內彼此信息不通其故殊不可解著阿桂福康  
安到彼時即查當時實在情形如果有貽誤之處即  
行據實叅奏至新教回民自蘇四十三滋事之後朕  
節次傳諭李侍堯令其嚴密查辦淨盡根株李侍堯  
雖不諳軍旅而於查辦地方事務尚所能為乃現在

各處新教回匪互相煽惑蔓延勾結擾害地方若非  
李侍堯平日不能留心覺察辦理不善何至賊匪猖  
獗若此是其養癰貽患為害地方李侍堯之罪實無  
可逭阿桂福康安到甘時俟勦賊完竣後務須嚴查  
賊匪經過起事一帶如有順從新教者即行盡數殲  
除勿留餘孽至賊匪所過村庄城堡有與賊人賁送  
糧食或傳遞信息併曾為賊人出力打仗者即為從  
賊夥黨必當盡予駢誅不可稍事姑容若本非賊匪

經過地方而又並未與賊人串通勾結者自是良回  
不必波及著傳諭阿桂福康安於此次勦戮淨盡後  
務將根株剪除毋使一名得以漏網方為妥善

上又命軍機大臣傳諭李侍堯曰本日據行在兵部奏  
甘省逆回不法來往文報皆闕緊要請飭令直隸山  
西陝甘督撫自京至甘省一帶添設腰站並酌添馬  
匹以備馳遞文報等語已諭令依議速行前據李侍  
堯等奏賊人焚劫西鞏驛搶去號馬及民馬二百餘

匹當經傳諭該督令其速行設法安置以達郵傳雖  
現在文報並無貽誤但賊人於鹿鹿山石峯堡一帶  
聚衆滋擾距安定會寧靜寧各州縣不遠該州縣均  
係甘省衝衢大路況該省勦賊事宜已有旨飛調川  
省屯練暨阿拉善兵各一千名赴甘協勦並令阿桂  
福康安帶同侍衛章京等及京兵一千名馳驛迅速  
前往李侍堯即不能辦理勦賊之事寧於地方事件  
尚不能妥協經理乎所有該省驛站著責成李侍堯

專辦設有貽悞則該督更罪上加罪矣再節次揀發往甘之滿洲道府較他省為多何以李侍堯於辦理軍務運送糧草等事未見奏及派委滿員承辦滿洲人員垂騎嫻習即使鞏昌一帶非該道府所轄均為該督省內之屬員亦應檄調前來幫同辦理著傳諭該督如此時辦理軍需臺站需人即於通省道府內酌調滿員數人分派承辦

上又諭內閣曰李侍堯等奏賊回滋擾通渭縣城隨經



派往勦捕之都司福德保岱什衣等奮力擊殺回匪  
即竄出城外當經查明知縣王樓在後園中倉房內  
藏匿訓導劉德跳樓右腿跌傷典史溫模自縊等語  
王樓當逆回滋擾自當率領民夫上城嚴密防守即  
或力有不支亦當罵賊而死為國捐軀凡沒於王事  
者國家自有議卹之典乃該令當賊匪攻城不能率  
衆防護竟至向倉房藏匿倖免偷生實屬無恥况典  
史微員尚知身殉訓導亦跳樓跌傷王樓係該縣知

縣乃竟訓導典史之不若國家安用此等縣令為耶  
王懷著革職掣交刑部照例治罪其典史溫模並著

交部議卹

同日阿桂奏言竊臣於本月十九日接奉

諭旨令將火器健銳兩營兵挑選一千名預備並酌派  
素嫻行陣之侍衛章京等分起帶領其派出之兵丁  
所有應得之項照例辦給欽此臣阿桂荷蒙

聖恩深重理宜馳驅行陣奮勉効力遵即前赴該營挑

派預備該兵丁等應得之項亦照例備辦俟再接  
奉

諭旨臣即帶領頭隊先行起程其餘四隊酌量驛站車  
輜便於輪流遞送臣即令派出之侍衛章京等陸  
續帶領約束前進間一日行走除領隊之侍衛章  
京等臣阿桂已於素所深知各員內酌量派往外  
伏思明亮春寧雖由愚昧無知身蹈重愆第伊二  
人於行陣之際俱曾經歷人尚勇往奮勉而明亮

尤為得力有用俱在

聖明洞鑑之中伊二人現在監禁轉得間居安逸臣愚昧之見懇請

聖恩將伊二人釋放或賞給侍衛拜唐阿令隨臣前往効力行走是否有當恭俟

諭旨後敬謹遵行再派出滿洲兵一千名必須領隊大臣約東方有專屬舒亮瑚尼爾圖二人或俱派往或即派舒亮前往之處請

旨遵行奏入

上諭曰領隊大臣著派舒亮去明亮春寧著賞給藍翎  
侍衛隨往打仗効力贖罪

二十二日丙子傳玉五岱永安剛塔俞金鰲圖桑  
阿奏言臣等於五月十四日據西安協領禪達理  
稟報副都統明善帶兵於十二日巳時往石峯堡  
進剿行至迤東五里有四五百逆回前來攻撲官  
兵奮勇剿殺賊匪敗竄我兵乘勝奪取賊匪頭二

卡正在安營掘濠之間忽護牆內有賊匪數十從  
高阜處撲下我兵鏖戰良久抵敵不住副都統明  
善受傷陣亡等因臣等聞信之下實深憤懣即欲  
帶兵往剿而賊回等在鹿鹿山深岩藏匿恃險攔  
守意欲伺隙始行下撲查現在各營內只有兵四  
千餘名若分往各處堵剿勢便單弱臣傅玉等公  
同商酌應請照四十六年剿滅蘇四十三時調取  
川省屯練兵來甘協剿該兵丁等善於跨越山險

較為得力臣等一面具奏一面飛咨四川總督李  
世傑成都將軍保寧令其選派二千名星即起程  
來甘並行知寧夏將軍莽古賚阿拉善親王旺沁  
班巴爾等調滿洲兵一千名阿拉善兵一千名迅  
速前至軍營俟所調之兵到齊再行相機進剿奏  
入

上命軍機大臣傳諭傅玉五岱李侍堯曰傅玉等奏賊  
匪現在鹿鹿山恃險攖守請飛調屯練阿拉善寧夏

各處兵丁俟到齊後再行相機進剿同日又據軍機大臣將所繪自西安堡至通渭一帶地圖呈進朕因閱該將軍等摺內並不籌及四面合圍之法仍係會集一處在賊對面扎營賊人現雖藏匿鹿鹿山不過因官兵尚未到齊該山居高臨下有險可恃為暫時踴負之計若見官兵踵至心懷畏懼勢必又思翻山逃竄此時各處回匪聚眾滋擾皆由剛塔在馬家堡縱賊逃遁所致前已節次有旨傳諭伊等當分撥將



領四面堵圍毋使賊人又從後路竄逸此旨諒伊等  
業經接奉若再不能嚴密堵圍賊人或復潛竄不但  
剛塔一人罪上加罪即現在軍營之領兵大員均不  
能當此重罪也至此事始終貽誤皆由李侍堯安坐  
靖遠並不親赴打仗處所督率調度及賊已竄逸仍  
思於賊踪不到之處逗遛駐劄畏葸不前以致軍營  
無人統攝全不上緊認真辦理即如本日傳玉等摺  
內有俟所調兵丁到齊再行進剿之語所調各兵非

十日半月可到豈有坐待彌月之理該將軍等所帶之兵現有四千餘名昨又據李侍堯奏續派兵一千六百名前赴軍營聽候調遣是兵力已不為少又有將軍統領副都統及提督總兵各大員在彼何至竟束手無策安坐營中與賊對持必待所調各兵到齊然後再行設法辦理況賊人由馬營街逃往鹿鹿山攜帶糧草自屬無多現既藏匿深山從何得食前已有旨傳諭李侍堯等留心訪察若有為賊私送糧食

之人即行查拏嚴辦此旨自亦已接奉該將軍等若果能嚴密防範使賊人無從潛出劫掠並新教黨類不敢暗為齎送糧食則賊人又安能久延殘喘再明善在石峯堡被害其所帶弁兵作何收集現交何員帶領其石峯堡之賊又作何勦捕李侍堯竟似置之不問而傅玉等則惟稱兵力不敷分撥任賊在石峯堡公然肆行無忌者此光景總由軍營內無督辦之人剛塔俞金鰲俱係提督職分相埒彼此既不相統

屬傅王係隔省將軍且年老不甚曉事五岱雖素嫻  
軍旅又係經過留辦客官呼應不靈以致互相推諉  
羣懷觀望又見明善打仗被害益形氣餒若李侍堯  
早能到彼督辦一切則領兵各員內即提鎮以下有  
怯懦不前坐失機會者該督自可據實糾叅何至徘徊  
畏葸漫無整頓傅王李侍堯剛塔俞金鰲圖桑阿  
俱著傳旨嚴行申飭李侍堯接奉前旨自己前赴軍  
營但此時勦賊關鍵總以嚴防後路四面圍攻勿使

賊人乘間遠颺為要朕閱軍機大臣所進圖內四至  
方向雖不能甚准而賊人滋擾之處既在通渭地方  
相距亦不甚遠已於圖內用硃筆約畧標記著五岱  
李侍堯等遵照妥辦其圖內地方山川營盤里數是  
否相符著詢查該處情形另行繪圖呈覽並諭阿桂  
福康安知之

上又命軍機大臣傳諭傅玉五岱曰前據陳步瀛奏星  
赴靜寧州收集明善所帶餘兵嚴防要隘以遏賊鋒

該臬司所辦尚屬能事但伊究係書生未嫻軍旅且此項兵丁既經失利之後則其氣已餒未必即能堵住賊人著再傳諭五岱等務須迅速派兵分堵要路加意嚴防並宜收集餘兵申明紀律以作士氣

上又命軍機大臣傳諭保寧曰前已有旨諭保寧選派四川屯練番兵一千名帶領赴甘協勦今據傳王等奏請調取屯練番兵二千名兵勢愈盛則勦捕愈為得力著保寧即遵照辦理其原派之一千名保寧即

帶領穆塔爾等星即起程赴甘其續調之一千名著酌派幹練副將統領前往

上命軍機大臣傳諭阿桂福康安曰副都統明善在高廟山陣亡伊所帶之滿漢官兵有一千二百名亦不為少僅遇賊匪四五百人何至一經接戰即行失利其故殊不可解或係該兵丁等怯懦所致著阿桂福康安到彼詳悉查明據實具奏

同日阿桂奏言竊臣欽奉

諭旨令臣將帶兵之侍衛章京酌量挑派臣謹就所知  
選派頭等侍衛額爾博克護軍參領星山保觀祥  
三等侍衛佛爾卿額德布星額定住塔爾弼善副  
護軍參領愛星阿永寧委護軍參領德成額等十  
員令其分起帶兵前往至應派之兵丁一千名臣  
阿桂於火器營內會同臣綿恩挑選於健銳營內  
會同臣復興等挑選將曾經出兵及技藝精嫻者  
每營挑派五百名共選派一千名除該兵等應得



箭枝綿甲火藥鉛丸俱令該處照例辦理即行給  
與外其應得銀兩仍照四十六年定例賞給查上屆  
各兵起程原係酌量車輛間一日即令一隊起程  
以期迅速行走此次酌令分兵為四隊每隊二百  
五十名令侍衛章京等仍間一日一隊起程已交  
兵部順天府遵照辦理奏入報

聞

同日法靈阿奏言臣自阿克素起程回京五月初

一日行抵西安聞固原州所屬地方回民李化玉等倡立邪教聚衆滋擾督臣李侍堯提臣俞金鰲等業經領兵前往勦捕臣聞信之下即星夜趲程前進徑赴督臣李侍堯軍營聽候調遣奮勉勦賊俟事竣再行回京庶稍盡犬馬報効之誠奏入報

聞

欽定石峯堡紀畧卷五

欽定四庫全書

欽定石峯堡紀畧卷六

史部

七

中書<sub>臣</sub>張經田覆勘

總校官檢討<sub>臣</sub>何思鈞

欽定四庫全書

欽定石峯堡紀畧卷六

五月二十三日丁丑阿桂奏言臣於五月二十四日帶領侍衛章京並京兵一千名由京起程按日分隊行走前往甘肅辦理勦捕逆回事宜臣查賊匪漏聚新教勾通接應膽敢抗拒官兵戕害大員攻城搶庫實為罪惡貫盈其黨夥雖多看其打仗器械不過力爭急則竄走乘勢劫掠前此各路徵

調之兵尚未齊集是以領兵將弁僅能在後尾追不能繞道截殺圍堵未得迅就擒滅至石峯堡進勦時明善追擊陣亡在已將賊擊敗之後因未悉該處地形急於逐利而失利其攻破通渭縣城之賊經該都司等帶兵前進所到官兵無多即行竄出是其草竊伎倆斷不能久肆鴟張指日兵力厚集四路堵擒即或有回匪接應而

天兵迅掃無難刻期蒞事臣一到甘省當悉心竭力與

福康安等會同籌辦務期勦捕盡淨早日完竣  
即可早一日仰紓

聖懷奏入

上諭曰勉為之速將逆回勦滅以慰懸望

同日李侍堯奏言臣查現在馬營之賊與石峯堡

之賊互為聯絡提臣剛塔俞金龍暨將軍傅玉副

都統圖桑阿永安護軍統領五岱合兵追捕賊尚

負固相持臣已添調官兵擒勦惟是賊人勾合各

處新教聚集多賊四出滋擾恐難尅期撲滅臣於出兵打仗又素未經練日來愈切焦憂反覆籌維若再有蔓延愈難收拾是以臣前已肅摺仰懇

聖恩簡派久經行陣之大臣侍衛來甘會同辦理以冀即為藏事至賊人狡黠詭詐到處暗伏奸細勾引新教匪徒除鹽茶靖遠拏獲之犯業經審訊辦理昨臣前來安定復於道旁見一道士形跡可疑拏獲盤詰隨加搜檢身帶矛傷三處嚴刑拷訊據供



名徐璠成即係賊營遣來勾結新教之賊又據該犯供出現在安定之匪黨數人旋經拏獲似此鬼蜮情形殊堪痛恨臣惟有嚴行訊究有無復往他處勾結之犯密速搜拏欽遵

諭旨務期剷盡根株不留遺孽

同日畢沅敷倫泰奏言竊臣畢沅接據西安滿營協領禪達禮稟稱西安副都統明善於五月十二日在石峯堡勦賊受傷陣亡臣等聞信之下不勝

髮指逆回如此猖獗不法已極必須厚集多兵迅速撲滅而甘省涇平以東兵力甚單不敷策應臣正在籌辦間復接固原提臣剛塔札開拏獲賊匪吳金一名訊據供稱賊衆商議齊集石峯堡後即搶奪伏羌秦州一帶等語又據各州縣紛紜稟報四處均有賊匪聚衆搶掠殃民且賊匪現已圍攻通渭縣城并聞石峯堡賊回聚集數千人現已札知興漢鎮帶兵前往秦州駐劄偵探賊情堵截擒

勦而汧隴一帶為陝省門戶必得重兵防守方保  
無虞臣畢沅查賊匪在靜寧通渭一路抗拒官兵  
該處南通秦鞏東南即逼近陝省之隴州鳳翔汧  
陽等處層巒疊嶂跬步皆山而甘省之秦州為迤  
南重鎮陝省之隴州為秦州門戶二處最為緊要  
現聞甘省大兵俱在北面勦賊將來賊回或南竄  
秦階或從東路竄入陝省之汧隴一帶均未可定  
該處山勢險峻路徑叢雜在在俱有回匪若賊人

由此竄入搜捕較為費手則隴州鳳翔實為陝甘南路交界阨要之處該地距通渭秦安不過二百餘里必得多兵堵禦以備不虞是以臣畢沅前

奏明飛調興漢鎮

臣

三德帶兵一千名前往守禦而

鳳翔隴州汧陽一帶通甘小路共有一十七處各處俱須兵防守今提臣剛塔復將總兵三德并將所帶之兵調赴秦州則陝省之鳳隴地方兵備全無倘賊匪乘虛竄入則關中震動為害更非淺鮮

此時若調他處官兵實屬鞭長莫及現在臣數倫  
泰蒙

恩調補西安副都統原擬即速起程前赴甘省但現據  
提臣來札賊匪既有東竄之信則撥兵前往隴州  
等處堵截刻不可緩而綠營又無統兵大員臣等  
再四酌商現有挑備軍標存營兵五百名臣數倫  
泰即行親自帶領於本日起程星夜前赴隴州相  
機堵截但該處各隘口甚多斷非五百名兵所能

堵禦查延綏鎮臣策卜坦現駐定邊該處雖通甘  
省靈州尚在北路就目下情形而論則汧隴更為  
緊急臣卑沅現已飛咨該鎮帶兵一千名星速前  
來堵截隘口以資捍禦但定邊距汧隴路程遙遠  
該鎮帶兵前往約須半月誠恐緩不濟急是以就  
近復行飛調興漢鎮兵五百名迅往隴州協同防  
守

同日剛塔奏言竊臣前奉

諭旨令安撫舊教並嚴密訪查新教欽此臣查舊教回民現俱守法安靜當即凜遵

聖諭明切出示遍行曉諭至臣標營所屬兵丁甚衆內難保無暗從新教之人正在留心訪查間適據固原州王琮稟報掣獲固原南關駱駝廠新教回匪馬昇貴供稱伊孫馬如林馬如海俱係固標兵丁一在軍營隨征一在鹽茶防守密請就近拘拏等情臣查馬如林馬如海係提標兵丁今經固原州

拏獲馬昇貴訊認新赦不法已經該州將家屬拏  
禁臣將馬如林馬如海立時拘拏查甘肅按察使  
陳步瀛現在駐劄鹽茶廳隨將該二犯派令妥升  
押解鹽茶廳交按察使陳步瀛審辦其餘標鎮協  
營官兵內均有回民臣仍留心密為訪查隨時妥  
協辦理不敢稍有疎忽均奏入

上命軍機大臣傳諭傳玉五岱李侍堯曰昨因賊人藏  
匿鹿鹿山防其復翻山逃逸已有旨傳諭五岱李侍



堯於賊營前後分兵親往圍堵本日據畢沅奏興漢鎮總兵三德所帶之兵一千名業經剛塔調赴秦州堵禦等語該鎮此時自己到彼防遏賊人後路是該處已有三德所領弁兵策應而五岱等之現住營盤在鹿鹿山石峯堡之間密邇賊人正關緊要著傳諭五岱等如兵力實不能分五岱竟可不遵前旨分兵圍繞賊人後路但當於現在劄營處所倍加小心防禦不可致賊人仍由舊路竄回靖遠西鞏一帶并

當設法派兵分堵石峯堡賊人要路以斷其互相聯絡之勢勿令賊人繞出官軍之後或致猝不及備為要至軍營內現有五岱暫行總理一切而帶兵之副都統提鎮大員亦不乏人傳玉年老在彼無益且敷倫泰現赴汧陽隴州一帶西安省城止有畢沅一人著傳諭該將軍即將所帶之西安滿漢官兵交與五岱永安管轄伊遵照前旨一面奏聞一面速行起程回至西安鎮守再本日據李侍堯奏於安定道旁拏

獲道士徐璠成據供乃係賊營遣來勾結新教之賊  
徐璠成既係賊營遣至安定經李侍堯盤獲何以不  
將賊營現在詳細情形向其嚴鞫況賊人既令匪徒  
改裝潛出勾結則其所遣者自不止一人亦必不止  
安定一處李侍堯尤應逐一研訊飛咨各處嚴密拘  
拏亦可以斷賊黨羽勾結且此數賊問明後何不即  
行正法又賊首田五殲斃後祇留餘黨馬鬍子李鬍  
子二人其被勾結入夥者又有楊填四張阿渾等此

時賊營內究係誰為總領頭目何以李侍堯均不向徐璠成訊明具奏此事始終貽悞總由李侍堯不早至軍前調度所致今於此等審訊賊匪事件尚復踈畧若此豈竟張皇失措至於此極耶至剛塔縱令賊人竄逸以致到處聚集滋事肆行無忌該提督此時尚有何面目覩然身列戎行至伊所奏拏獲兵丁馬如林馬如海俱係新教回匪既係新教即當正法何必解交地方官行軍之事豈可拘例若是乎已有旨

傳諭陳步瀛將該犯審明正法又據李侍堯奏稱現在馬營之賊與石峯堡之賊互為聯絡等語賊人各聚一山彼此何由聯絡必係暗中差遣匪徒往來通信始得互相勾結若官兵果能晝夜嚴密巡邏并於要隘堵截盤詰將此等送信之人立時拏獲正法則賊信既斷賊勢自孤豈李侍堯等不能帶兵進攻剿滅賊衆而於一二來往送信賊匪尚不能設法邀截耶將此傳諭五岱等並諭令阿桂福康安知之

上又命軍機大臣傳諭敷倫泰三德曰畢沅等奏接據  
剛塔札稱拏獲賊匪吳金訊供賊衆即欲搶奪伏羌  
秦州一帶現已札知興漢鎮總兵三德帶兵前往秦  
州堵截因思汧隴一帶為陝西門戶現將挑備軍標  
存營兵五百名交敷倫泰帶領前往相機堵禦等語  
所辦甚好賊匪既有搶奪伏羌秦州之語該處必須  
大員帶兵迎截現在五岱等在鹿鹿山劄營堵剿兵  
勢似單未便再分三德到彼正可斷賊人南竄之路

並須將該處已入新教回匪詳悉查明概予駢誅不  
可稍事姑息至汧隴一帶為東南入陝門戶最關緊  
要若賊人由此路竄入該處山路叢雜恐其又有煽  
動勾結之事著傳諭敷倫泰即帶領官兵將該處通  
甘隘口嚴行堵截並隨時偵察奸細勿使兩省回匪  
暗相聯絡其所帶西安兵丁五百名不敷防守已據  
畢沅奏飛調興漢兵五百名迅速前赴隴州興漢距  
隴州不遠此項兵丁想已到齊敷倫泰即當上緊派

撥令其協同西安兵丁併力防禦使陝甘交界處所  
毋有疎虞方為妥善數倫奏既在汧隴防守不必再  
行赴甘將此並諭畢沅知之

上又命軍機大臣傳諭陳步瀛曰陳步瀛前奏收集明  
善餘兵嚴防要隘以遏賊鋒自陳奏後迄今已有十  
日靜寧州一帶地方是否寧謐明善所帶之兵收集  
後共有若干是否尚足資防堵未據該臬司續有奏  
到深為廕念著傳諭陳步瀛即將該處地方及現在



賊衆情形并該司在彼作何設法防範之處迅速具  
奏陳步瀛既在靜寧一帶料理一切如該處有應行  
陳奏之事即當據實具奏原不必拘泥體例稟明督  
臣以致轉輾遲延也至馬如林馬如海二犯現據剛  
塔奏已解交該司審辦該二犯解到時審明後即當  
立時正法勿致稽遲稍有疎虞

同日李侍堯又奏言臣據安定縣知縣陳善儀稟  
稱署典史費元燈先因委赴官川密訪賊蹤該典

史帶領壯役十數名前至官川旋據衙役奔回面稟該典史於二十七日至馬家堡適遇賊回亦到將衙役赶散該典史不知下落嗣賊人自馬家堡南竄後該縣復差役於馬家堡內尋獲該典史身屍實係被賊殺害並有衙役吳朝鳳劉剗亦一併受傷身死等情據稟理合將該典史費元燈被賊戕害緣由附摺奏明奏入

上諭內閣曰署安定縣典史費元燈遇賊捐軀殊為可

憫著交部照陣亡例給予卹典至衙後吳朝鳳等同  
時被害並著李侍堯查明從優賞卹該部知道

同日直隸總督劉峩奏言竊臣欽奉

諭旨辦理京兵過境事宜臣查京兵一千名既已分為

四起則所需車輛為數無幾臣已遵

旨傳諭藩司景祿查照向辦成案務須不動聲色妥密  
預備俾京兵迅速過進奏入報

聞

二十四日戊寅剛塔奏言臣於接奉

諭旨後恐舊教回民心懷疑懼已屢次出示愷切曉諭  
並諭沿路被賊裹脇民人令其痛自猛省速為解  
散如有能將賊人頭目斬取首級或擒獻到官不  
但重賞亦即按功超擢惟查賊匪經臣前在狼山  
勦捕餘黨僅八九十人竄往官川一帶復有新教  
逆回相從者甚多誠如

聖諭自係田五斃後餘賊又復隨處勾結脅誘又臣自

馬泉灣馬營街一帶節次拏獲賊匪供稱復有新  
教逆回賊首馬三阿渾張阿渾馬壯等俱聚衆不  
法約有數千名現在鹿鹿山石峯堡及附近通渭  
伏羌各處據險抗拒官兵茲於十五日已刻鹿鹿  
山賊匪約有千餘名前來攻撲臣等營盤臣等當  
即選派將領帶兵分頭迎擊賊匪並不迎敵徐退  
高山拏卡臣伏查賊匪旋散旋聚現在鹿鹿山扎  
營數處賊衆約有數千而又於附近通渭縣城伏

羌等處扎營與石峯堡之賊互相聯絡猖獗殊甚  
且賊人散竄滋擾必得重兵分路勦捕方能尅期  
殲滅淨盡業已飛咨興漢總兵三德令於鎮屬挑  
派精兵一千名帶領由秦州一路迎擊勦捕又飛  
咨延綏總兵策卜坦帶領一千名速赴靜寧一路  
偵探前進並札致督臣再酌調附近滿漢官兵兼  
程前來圍剿以期迅速完結臣等現在和衷商酌  
悉心籌畫相機進攻奏入

上又命軍機大臣傳諭五岱李侍堯數倫泰三德曰本日據剛塔奏現在賊匪情形內稱拏獲賊人吳金據供有聞得賊衆商議攻搶通渭伏羌秦州潼關等處以斷文報之語此供斷不足信賊匪聚衆滋擾伏羌秦州一帶回匪素多或思竄往該處為勾結接應之計尚為情事所有至潼關遠在西安省城之東諒此草竊伎倆豈敢離其巢穴不畏官兵迎截勦殺逕至潼關之理此必係賊人故為散播謠言希圖煽惑衆

心此等匪徒一經拏獲剛塔等原應嚴密審鞫訊明  
後並即行正法何得於軍營衆廣之地任其信口混  
供此時賊勢蔓延皆剛塔疎脫之罪今於審訊賊人  
又全不小心詳慎剛塔何不曉事至於此極耶又據  
奏稱賊匪旋散旋聚現在鹿鹿山扎營數處而約有  
數千又於附近通渭縣伏羌等處扎營與石峯堡之  
賊互相聯絡等語既扎營數處何不帶奮勇之兵單  
勦其一營別令兵截其來援之賊此或一法也徒擁



兵坐視以待其翻山而逃又引兵尾追其後而又不  
及成何事體有如此用兵之理乎附近通渭伏羌等  
處扎營又係何項賊匪何以李侍堯等節次摺內均  
未據奏及看來伊等竟係張皇失措一味怯懦遂至  
漫無主見認聽賊匪妄供輒信為實著再傳諭五岱  
等務宜遵照前旨於官軍現扎營盤處所倍加小心  
防禦並設法緝拏為賊送信之人以斷其互相聯絡  
之勢但盤獲後當密訊供詞迅速正法不可又如剛

塔之拘例審辦並著傳諭數倫泰三德等在賊人後路之伏羌秦州汧陽隴州一帶小心防範嚴密堵截勿致疎虞

上又命軍機大臣傳諭畢沅策卜坦曰昨據畢沅等奏副都統數倫泰帶兵五百名親往隴州一帶堵剿賊匪但該處隘口甚多因飛咨延綏鎮總兵策卜坦帶兵一千名前往捍禦等語所辦甚是本日又據剛塔奏稱已飛咨策卜坦帶兵一千名速赴靜寧一路偵

探前進甘省勦殺賊回已調集各路兵丁數千現又  
調四川屯練降番及阿拉善各處弁兵並派京兵前  
往即日當陸續到甘足資調遣而陝省汧隴一帶山  
勢險峻為東南入陝門戶且俱有回民居住防範堵  
禦甚關緊要現在雖已降旨令敷倫泰帶兵前往該  
處防禦猶恐兵力稍單著傳諭畢沅酌量情形如汧  
隴一帶可無需策卜坦在彼防禦即一面奏聞一面  
咨會該鎮帶兵前赴靜寧一路會同五岱剛塔等併

力合勦如隴州一帶必得重兵堵禦則仍令策卜坦  
星赴隴州一帶教倫泰帶領官兵在該處通甘隘口  
嚴行防範竟不必往靜寧總期酌量該處實在情形  
妥協辦理不必拘泥檄調也

二十五日己卯李侍堯奏言現在官軍移駐附近  
石峯堡之鹿鹿山黑風嘴扎營犄角賊亦據險相  
持雖據傳玉剛塔等稱以賊人恃險自守察其意  
如無便宜不來侵犯官軍伊等公同商酌相視有

可乘之機再帶兵進勦臣竊慮賊若於山前牽綴  
官兵潛分賊黨侵擾後路不可不防業經札致商  
酌挑派官兵繞出後路於總要之處預行堵截以  
防逸出滋擾惟是賊人近日糾聚較多又與馬家  
堡窮賊竄踞之時情形不同剛塔等既已分路攻  
勦兵力尚單須視有可乘之機再行進勦臣又未  
敢嚴急督催指日添調之兵陸續前往自可合力  
攻圍以期殲滅再臣前來安定於途次掣獲奸細

徐璠成訊據供出安定城中通賊匪犯數名當經  
拏獲審訊茲審訊賊犯馬三九子又供出通賊之  
犯數十名隨即密速嚴拏全行弋獲嚴加刑訊據  
供均係知情與賊勾通並供仍欲往蘭州河州勾  
合新教潛赴賊營等語臣伏思賊人預蓄奸謀四  
出勾合幾於遍處布伏夥黨似此鬼域情形殊堪  
切齒今其所遣奸細紛紛敗露所有現獲各犯已  
經審明正法者二十名其餘隨審隨辦至供出蘭

州河州勾合之匪臣已密札藩司暨河州鎮設法密拏嚴行訊究辦理奏入

上命軍機大臣傳諭福康安五岱李侍堯曰據李侍堯奏官軍現移駐附近石峯堡之鹿鹿山黑風嘴扎營賊亦據險相持竊慮賊人於山前牽綴官兵潛分賊黨侵擾後路業經札商挑派官兵繞出後路於總要之處預行堵截等語此想雖是朕已早見及此屢有旨傳諭五岱等加意圍堵矣李侍堯既慮及賊人侵

擾後路即應星赴打仗處所與五岱等面商辦理且賊已南竄現在安定一帶驛遞往來均無阻礙有何必須該督親身在彼料理之事乃仍於該縣安然遙駐惟以札致了事其故實不可解此時帶兵各員內剛塔俞金鼇等惟稱兵力尚單與賊對持坐守五岱又係客官呼應不靈傳玉係隔省將軍昨已有旨令其速回西安而李侍堯復在安定逗遛且其神氣亦露張皇畏怯現在軍營並無有識見督率調度之人



想福康安未到之前附近調往之西寧寧夏阿拉善  
四川番土各兵自必先到著傳諭福康安星夜兼程  
迅速赴該處籌畫妥辦以作士氣而肅戎行五岱等  
此時惟當於各要隘處所晝夜嚴密防堵勿使賊人  
又得乘間從後路翻山逃遁俟福康安一到各路大  
兵雲集壁壘一新自無難一舉殲擒尅期竣事也再  
據該督奏稱前在安定盤獲奸細徐璠成究出賊犯  
馬三九子及通賊之匪數十名隨拿到案據供均係

知情與賊勾通并欲往蘭州河州勾合新教潛赴賊營等語賊人鬼蜮奸謀四出勾合蘭州省會重地河州一帶尤係回民巢穴自不可不留心嚴為防範馮光熊現在省城哈當阿亦在河州防守著李侍堯即嚴行札飭該藩司總兵一體設法嚴密稽查如有此等為賊送信勾結之人立即拘拏跟究並將其所欲勾合之回匪一併拏獲速行正法毋任賊人得以潛相煽惑再有蔓延

上又諭內閣曰甘省逆回滋事軍行糧餉甚關緊要原任陝西按察使浦霖現在來京候補該員曾在金川辦理軍需尚為熟練著即馳驛速赴甘肅辦理軍需事務毋庸至熱河請訓

同日李侍堯又奏言三等侍衛蘇凌阿自英阿離爾換班回京行抵甘肅知逆回滋擾之事前來見臣據稱雖素係文員未經打仗但受

皇上重恩情願効力臣查該員既願留甘効用自當給

與差使但該員未經出兵派往軍營亦屬不能得力現在趕運軍糧火藥鉛丸等項事務較繁雖已奏派蘭州道宋維琦來往督催尚恐有不能兼顧之處臣擬即派蘇凌阿幫同催辦更可妥速奏入報聞

二十六日庚辰傅玉五岱永安剛塔俞金鼇圖桑阿奏言臣等因賊匪佔據鹿鹿山石峯堡山高險峻道路窄狹深溝石崖難以立即進攻隨選派弁

兵遠道探路以便前進自十三日辰刻大雨如注  
至十四日未刻止又十四日酉刻大霧微雨直至  
十七日方止頃據派往探路弁兵報稱五月十七  
日有賊千餘名從鹿鹿山後遠出現在離此七十  
里之烏家坪扎營等語臣等伏查賊匪忽散忽聚  
詭詐多端現在與賊對面扎營石峯堡賊匪出入  
不斷又有賊人遠出在烏家坪地方扎營烏家坪  
相距伏羌一百餘里想來勾引伏羌新教攪擾地

方州縣城池關係匪細查現在佔據鹿鹿山石峯  
堡尚有賊人數千據險抗拒必得相機勦捕臣傳  
玉等公同商酌臣傳玉永安帶領西安原來滿漢  
官兵在於鹿鹿山要口拏營堵禦相機勦捕臣五  
岱剛塔俞金龍圖桑阿同涼寧二鎮蘇靈吉蘭泰  
城守尉額爾恒額帶領固原甘州涼州寧夏官兵  
並土司楊宗業之番兵即刻起程前往烏家坪一  
路追勦

同日李侍堯奏言竊臣接奉

諭旨飭詢

臣

於五月初五日尚係在靖遠拜摺何以不

即往馬家堡相機進剿乃安居靖遠將帶兵調度

事宜諉之剛塔等承辦一節伏查臣於四月二十

六日由鹽茶起程赴靖遠二十七日與提臣剛塔

會晤於劉家井面相商定臣赴靖遠督捕糜子灘

餘匪剛塔帶兵由余家溝李陽川一帶追躡賊人

業將分辦緣由奏

聞嗣臣於二十八日抵靖遠剛塔於是日自劉家井起程三十日抵郭城驛探知賊人現在馬家堡黑莊屯聚隨派遊擊汪起等帶兵先往剛塔於初一日至頭寨子初二日與賊打仗初四日賊人即乘夜潛逃計官兵與賊人在馬家堡相距為期四日惟時臣至靖遠正當賊人攻城甫退之後民情未免驚惶尚有鷹窩石竄踞之賊派兵勦捕又城中新獲內應之賊百餘人臣不得不暫留審辦是以未



暇即赴馬家堡又奉

諭旨飭詢靖遠鹽茶一帶在在皆有地方營汛弁兵似此送回謀為不軌鄉約尚能舉首弁兵等豈有坐視賊匪經過不行稟報一節伏查田五等謀興新教原係暗蓄逆謀鄉約亦係回民同村居住所有平素往來之人及臨時勾合蹤跡斷難掩其耳目是以即能舉首此案當李化雄等赴營首告之時賊回尚未舉事是以營汛弁兵知覺轉在鄉約之後又

奉

諭旨以官川一帶從賊回民必係馬明心餘孽事竣後  
必當趁兵力厚集嚴密查辦其小岔口等處新教亦  
當以漸查辦務盡根株一節伏查官川為馬明心首  
禍之地流毒猶存前歲蘇四十三案内奉有

諭旨如有已歸新教而仍自認為舊教者是尚知畏罪  
只可亦因其避就量予生路詎伊等怙惡不悛改稱  
舊教仍從新教此次賊人敗竄余家溝本不及百

人乃因糾合官川新教復聚多人遂敢抗拒官軍  
復有小岔口等處從逆之賊此等惡不畏死之徒  
自當欽遵

聖諭事竣後趁此兵力厚集之時盡數搜拏嚴行辦理  
以期剷盡根株臣在鹽茶靖遠安定節次審明辦  
理統計有四百餘名尚有現審未辦者伏念此等  
逆回敢於光天化日之下謀逆滋擾實屬罪不容  
誅復何敢稍存婦人之仁致留餘孽又奉

諭旨查詢靖遠城內勾通內應之犯多至八十餘名連家屬竟有一二百名伊等蓄謀已久及聞田五起事何肯安坐城中束手就擒一節臣查該犯等於本年正月內田五至靖遠掌教哈得成頭人哈彥家商同謀逆令其轉約城內新教俟起事後攻打靖遠勾通內應哈得成轉為糾約趁三月十五日衆新教回人齊集禮拜寺將田五糾從謀逆情節告知勾令臨期內應該犯等均屬知情是以潛伏

城中以待賊人之至預約於夜間放火內外夾攻而逆謀未露舉首無人該犯等亦自混良民之中並有隨同民夫上城防守者當賊人白晝攻城該犯未敢即舉動嗣因守城官兵放鎗擊斃多賊又挈獲鎗傷不能遁走之賊犯田重交嚴訊供出內應各犯密開名姓維時天已傍晚有候補吏目朱爾漢因人衆未敢聲張暗帶兵役託稱喚令守城將各犯誑出指令兵役按名擒挈其城上之賊朱

爾漢將城內軍流人犯帶領上城全行挈獲收禁  
正犯既已就擒其家口更無難弋獲此靖遠內應  
各犯束手就獲之原委也又奉

諭旨查詢馬海龍是否即係馬鬍子李化龍是否即係  
李鬍子李化玉是否係李鬍子族黨一節臣查馬海

龍已經正法並非現在賊營之馬鬍子至李鬍子  
名李可魁亦非已經正法之李化龍其李化玉係  
固原馬尾川人李鬍子係鹽茶小山人係同逆而

非同族又奉

諭旨查詢鹽茶與靖遠地方相距道里若干城堡村莊  
被賊人搶掠後現在情形如何臣查鹽茶距靖遠二  
百四十里臣從鹽茶赴靖遠經過各鄉堡村莊查  
知賊過之時居民商賈均經逃匿賊退之後漸次  
歸來就臣途次所見有已經安堵者亦有僅存空  
舍者近因賊人遠竄歸業紛紛臣即當欽遵昨奉  
諭旨飭令該地方官查明被掠村莊酌加撫卹又奉

諭旨飭詢固原至馬家堡黑莊等處相距不過四五百里何以臣節次摺內聲叙剛塔追躡賊蹤之處竟似相隔甚遠彼此信息止憑文札往來一節查提臣剛

塔於四月二十日在固原起程臣即於是日抵固

原迨臣抵鹽茶剛塔在打喇赤狼山一帶打仗迨

臣抵靖遠剛塔在馬家堡黑莊相距一百餘里聲

息相通迨賊人翻山夜遁由西鞏南竄馬營剛塔

跟蹤追捕與臣相離漸遠臣恐聲息難於迅達隨



即

奏明前赴安定鞏昌視賊蹤較近之處駐劄臣因甫抵安定即有拏獲奸細供出城中通賊之犯連日查拏審辦又據傳玉剛塔等札稱賊聚較多若欲分路進剿兵力尚單現調之寧夏阿拉善四川屯練兵丁尚未到甘須視有可乘之機再行進剿臣又未敢嚴急督催今臬司陳步瀛已來安定臣將審辦賊犯之事交令辦理臣即前赴軍營與五岱

剛塔等商酌辦理

同日延綏鎮總兵策卜坦奏言竊臣於五月二十日接准撫臣畢沅劄知賊回夥聚石峯堡欲自通渭伏羌秦州竄入陝西境內令臣帶兵四五百名迅速由金鎖關取路前往隴州防守等因臣正在起程間接奉

諭旨策卜坦現已帶兵由定邊靜遠起程前往截捕賊匪倘賊衆潛竄入陝西境即於該處要隘堵截無使

一名兔脫等因欽此臣查榆林等處地界沿邊雖屬緊要但現在地方安靜無事臣星速帶兵即日馳赴鳳隴一帶嚴防隘口堵截竄逸賊匪並派神木協副將彭智年代臣辦理本鎮一切事務茲於途次復接提臣剛塔來札內稱逆回聚衆鹿鹿山石峯堡等處勢甚猖獗該鎮即帶兵一千名速赴軍營協勦等因臣查甘肅靜寧一帶既需兵力接濟理合帶領官兵取道前往剛塔軍營協同勦賊均

奏入

上命軍機大臣傳諭阿桂福康安五岱畢沅策卜坦曰  
前以五岱等奏賊人藏匿鹿鹿山官軍仍對賊扎營  
朕恐賊復翻山逃遁並慮石峯堡之賊繞出官軍之  
後滋擾屢有旨訓諭五岱等當加意防範今思軍營  
現在兵力已不為少五岱等何不分遣遊兵於賊人  
出入要隘四路分投偵探既可以得賊營實在情形  
兼可以斷賊勾結匪徒濟接糧食之路正在降旨飭

諭間復據五岱等續行奏稱十七日據派往探路弁  
兵報稱有賊千餘名從鹿鹿山後逸出離鹿鹿山七  
十里之烏家坪扎營該處離伏羌一百餘里想係勾  
引伏羌回匪滋擾等語賊人狡詐多端於山前牽綴  
官軍潛分賊黨從山後赴伏羌滋擾果不出朕之所  
料該處領兵各大員所司何事竟不及早籌畫分兵  
堵禦以致賊匪又分從山後逸出始行帶兵尾追軍  
營現在官兵已有數千且該督等所調之寧夏阿拉

善等處兵丁此時自己陸續到營是該處兵力不為不多並非不敷勦賊之用總由五岱係客官不能作主而李侍堯剛塔等失志張皇毫無籌辦以致節次俱落賊人之後思之實深憤懣豈每事皆候朕於數千里外為伊等一一指畫耶昨已有旨傳諭福康安星速馳赴該處督辦此時五岱等務當於要隘處所嚴密防堵或繞出烏家坪之前以截賊人去路勿使又得乘間遠颺四出滋擾看來該處官兵已敷勦賊

唯無人調度未免氣餒福康安接到此旨務宜加緊  
晝夜趲行到彼督辦福康安早到一日庶辦賊事宜  
早得一日之益也本日又據李侍堯因接奉節次飭  
詢諭旨逐款覆奏所奏總不成事體如所稱本年正  
月內田五至靖遠哈得成哈彥家商同謀逆令其轉  
約新教勾通內應哈得成於三月十五日趁衆新教  
回人齊集禮拜寺時將田五糾從謀逆情節告知是  
何言耶從前蘇四十三殄滅後即責成李侍堯斷除

新教今哈得成等竟公然於禮拜寺齊集衆新教回告  
知田五糾從謀逆情節是該犯等倡教蓄謀已非一日聚集又非  
一人李侍堯身任封圻平日何竟毫無覺察以致養癰貽患又  
據奏稱前歲蘇四十三案內奉有諭旨如有已歸新教而仍  
自認為舊教者是尚知畏罪亦只可因其避就量子生路  
詎伊等怙惡不悛改稱舊教仍從新教所奏更屬支離  
賊人膽敢於禮拜寺糾衆同謀是其逆形已露必非  
倉猝勾合之事且較蘇四十三為甚該督何得強以



前詞藉口欲為却罪地步耶又奏稱鹽茶靖遠安定  
辦過賊匪統有四百餘名尚有現審未辦者不得不  
暫留審辦未暇即赴軍營此等從逆之賊問明即行  
正法有何疑難不決即或須暫留審辦數日尚可何  
至十日半月之久此不過該督心存畏怯借遷延為  
不往軍前之計耳近來見朕催往軍前知其過而強  
為之辭欲誰欺耶此事始終貽悞皆由李侍堯平時  
惟安坐衙署全不知督率地方文武員弁稽查回匪

以致新教蔓延及賊已滋事又不親身前往軍營會  
籌勦捕反借審訊賊犯家屬為由於靖遠安定等縣  
逗遛駐劄致領兵各員不相上下互為推諉羣懷觀  
望使賊得乘間四出勾結滋蔓經朕降旨飭詢該督  
覆奏摺內尚一味避重就輕意圖卸罪試思朕前豈  
可以文辭支飾耶除已將該督悞事緣由明降諭旨  
外並著將本日李侍堯奏到之摺錄交阿桂福康安  
閱看俾共知此事貽悞原委再據李侍堯奏稱賊犯

田重交供出靖遠內應回匪姓名維時天已傍晚有  
候補吏目朱爾漢因人衆未敢聲張暗帶兵役將各  
犯誑出按名擒拏等語朱爾漢以吏目微員能將內  
應賊犯用計妥速按名密拏甚屬可嘉何以李侍堯  
前在靖遠竟未奏及事定後阿桂福康安即將該吏  
目出力之處聲明送部引見此時若有知縣缺出即  
可委署至策卜坦於接剛塔咨後已帶兵星赴靜寧  
即在該處協同防勦毋庸拘泥前旨更赴隴州也

上又諭內閣曰從前甘省蘇四十三因新舊爭教地方官辦理不善致釀事端小醜跳梁立時撲滅經朕節次降旨令李侍堯將通省新教回民當不動聲色密行查辦遠遣斷絕根株以靖邊疆而安良善是查辦新教係李侍堯分內專責經數年間該督祇查拿一二人奏明辦理乃為時無幾遂有固原所屬小山回民田五等聚衆謀逆之事攻城掠堡傷害官兵因令李侍堯查明賊人起事根由據奏靖遠城內回民於

本年三月十五日衆新教回人齊集禮拜寺將田  
五糾從謀逆情節告知勾令臨期內應等語是賊  
人多係新教久蓄逆謀公然於縣城中齊集糾約  
李侍堯安坐省城毫無聞見則從前之查拿一二  
回匪不過藉以塞責而其並不寔心查辦已屬顯  
然迨賊首田五就斃餘黨竄入馬家堡剛塔等帶  
兵追趕李侍堯惟知株守靖遠藉稱審辦賊犯家  
屬而於一切攻剿機宜竟視為非伊總督本分應

辦之事祇委之提督以致軍營統攝無人賊匪乘間翻山而逸經朕再四訓飭李侍堯始行移駐安定仍與剛塔等軍營相距遙遠彼此信息祇憑文札往來行軍之道有如此之玩延懦怯者乎且各處從逆賊匪一經拿獲即當審明立時正法乃據奏鹽茶靖遠安定地方尚有現審未辦之犯此等為逆回匪有何疑難耽擱李侍堯無非藉以遷延觀望遠避賊鋒巧為卸過地步是其避重就輕預

存文飾之見豈能掩朕洞鑒真所謂欲蓋彌彰也  
此事李侍堯既玩愒于平時又畏蒞於臨事遂致  
賊勢蔓延猖獗到處勾通李侍堯之罪實無可逭  
李侍堯着革職暫留甘省帶罪効力辦理軍需事  
務俟剿賊事竣後再降諭旨其陝甘總督員缺着福  
康安補授福康安到甘時再行傳旨接印任事至剛  
塔於賊匪竄入馬家堡時並不堵截後路縱賊潛逃  
復札會總督展轉耽延迨賊遠颺始帶兵尾追以致

賊人四出勾結日益滋蔓擾害地方且於賊人攻破  
通渭縣城及在石峯堡肆行紛擾之處毫無策應失  
機債事其罪更無可逭剛塔着革職拿問解交刑部  
治罪其固原提督員缺著哈當阿補授現在河州有  
防範事宜哈當阿不宜即離彼處其未到任之前著  
五岱署理固原提督事務現在各處官兵厚集阿桂  
福康安先後到彼相機攻勦諒此窮竄么膺自無難  
即時殄滅所有李侍堯剛塔辦理此事始終貽悞緣



由並通諭中外知之

臣等謹按逆回久蓄異謀潛思蠢動督臣李侍堯平時漫無見聞已屬秦賊養癰迨夫潢池竊發又復怯懦遷延一切攻勦機宜竟誤之提臣並不實心籌畫甚且遠避賊鋒株守縣城畏葸張皇始終貽誤屢經

嚴旨飭詢尚不思愧悔自効引咎刻責輒於覆奏摺內藉詞委却是其回護欺飾之罪難逃

聖明洞鑒至提臣剛塔於賊匪起事時不能督兵連剿  
及賊已遠颺惟知在後尾追致令妄肆鴟張擾  
害地方玩寇失機莫此為甚核其情罪俱屬負  
恩債事難以曲貸

皇上特降諭旨宣示中外分別褫職逮問

賞罰禍福悉視臣工之自取迨後在廷集議請正典刑  
爰書既定百喙奚辭書曰自作孽不可逭其是  
之謂歟



欽定石峯堡紀畧卷六